

Terima 341 aduan salah laku media baharu

Harian Metro 30/7/2022 (page 22)

Kuantan: Suruhanjaya Komunikasi dan Multimedia Malaysia (SKMM) Pahang menerima 341 aduan membabitkan salah laku media baharu dalam tempoh enam bulan tahun ini.

Pengerusi Jawatankuasa Sains, Teknologi, Inovasi, Komunikasi dan Multimedia negeri Datuk Mohammad Fakhruddin Mohd Ariff berkata, aduan diterima membabitkan penipuan, ugutan dan sebagainya yang dilakukan individu melalui media sosial, e-mel serta laman web.

Katanya, perbincangan antara Polis Diraja Malaysia (PDRM), SKMM dan wakil

kerajaan Pahang perlu diadakan bagi mencari solusi serta menetapkan mekanisme tepat membuat aduan.

“Hasil perbincangan itu nanti disampaikan kepada rakyat Pahang terutama mereka yang terkesan akibat penipuan dalam talian untuk mengetahui langkah tepat bagi membuat aduan.

“Ini membuktikan kerajaan negeri mengambil berat dan serius menangani salah laku di media baharu dalam talian,” katanya pada majlis perasmian Program *Open Source Intelligence* (OSINT) anjuran SKMM dengan kerjasama PDRM di sini, kelmarin.